

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN RAMLI BIN DATO' MOHD NOR  
[ CAMERON HIGHLANDS]**

**TARIKH : 14 JULAI 2020 (SELASA)**

minta **MENTERI PEMBANGUNAN LUAR BANDAR** menyatakan perancangan ekonomi, infrastruktur dan sosial dalam Parlimen Cameron Highlands bagi masyarakat Orang Asli untuk tahun 2020.

**JAWAPAN**

Tuan Yang di-Pertua,

Untuk makluman Yang Berhormat, dalam usaha meningkatkan taraf hidup masyarakat Orang Asli, JAKOA meneruskan strategi dalam Pelan Strategik JAKOA 2016-2020 menerusi Teras 4 Pembangunan Ekonomi Mampan. Bagi tahun 2020 di Cameron Highlands, JAKOA telah merancang program ekonomi dengan pemberian bantuan melalui Projek Ladang Masyarakat Orang Asli (PLMOA) sedia ada di Pos Lenjang Fasa 2, Pos Sinderut Fasa 2, Pos Sinderut Fasa 3 dan Pos Sinderut Fasa 4 dengan jumlah keluasan keseluruhan 608.2 hektar yang melibatkan 501 peserta.

Melihat kejayaan menerusi Projek Ladang Masyarakat Orang Asli (PLMOA), JAKOA menambah empat (4) lagi projek baharu PLMOA pada tahun 2020 di Pos Simoi, Pos Sinderut, Pos Lenjang dan Prosdet Pantos dengan jumlah keluasan 169.20 yang melibatkan 141 peserta. JAKOA juga sedang merancang kerjasama dengan rakan sinergi iaitu MARDI untuk membangunkan projek pertanian di Cameron Highlands pada tahun ini.

## **NO. SOALAN : 9**

Seterusnya melalui JAKOA juga, Kerajaan telah melaksanakan pelbagai projek di perkampungan Orang Asli bagi menyelesaikan isu infrastruktur asas seperti jalan, elektrik, sumber air bersih dan perumahan bagi masyarakat Orang Asli khususnya di kawasan Parlimen Cameron Highlands.

Untuk makluman Yang Berhormat, pada tahun 2020 sebanyak 7 projek infrastruktur dan ameniti sosial akan dilaksanakan di parlimen Cameron Highlands yang memberi manfaat kepada seramai 855 penduduk.